

Müller

J. C. Burnett

37928/P

Glandes Guernae

= (guernae)

LIBRAIRIE ANCIENNE & MODERNE  
**ERNEST THORIN**  
*Libraire du Collège de France*  
et de l'Ecole Normale Supérieure  
7, Rue de Médicis, 7.  
A PARIS

37728/P

SUSPICIOSAS  
GLANDIVM QVERNARVM  
LAVDDES MEDICAS

\*\*\*\*\*

PRAESIDE

PETRO IMMANVELE HARTMANNO,

PHIL. ET MED. DOCT. PATHOLOG. THERAP. CHEM. ET BOTAN. PROF.  
PVBL. ORDIN. ACAD. CAESAR. NAT. CVR. ET ELECTOR. MOGVNT. ER-  
FVRT. SCIENT. VTIL. ITEMQVE SOCIETAT. BEROLINENS. NATVR.  
SCRVTATOR. ET DVCAL. TEVTON. HELMSTAD. SODALE, ORDINIS  
MEDICI HOC TEMPORE DECANO,

AD D. IVLII CIOCCCLXXVIII.

DOCTORIS MEDICI DIGNITATEM

LEGITIME CAPESSVRVS

PVBlice REPVTAT

AVCTOR

IOANNES IACOBVS MÜLLER,

GREIFFENBERGENSIS POMERANVS.



---

TRAIECTI AD VIADRVN,  
E TYPOGRAPHEO WINTERIANO.







## PROOEMIUM.



Quotiescunque medicorum, nostra  
aetate viuentium, indefessa in  
exquirendis nouis, recolendis-  
que antiquis remediis, a salubri efficacitate  
commendabilibus, studia tacite mecum re-  
puto, toties in admirationem curae horum  
virorum diligentiaeque animum agi sentio,





simul tamen satis mihi temperare nequeo,  
quin in tanta rerum nouarum recultarum-  
que vbertate luxuriam quandam inesse exi-  
stimem, acriori cura denuo depascendam.  
Quis enim tot noua, tot a veteribus repe-  
tita enumeret medicamenta, quot nupero-  
rum viginti annorum industria materiae,  
quam nos dicimus, medicae vindicauit?  
Quid memoremus cicutam, hyoscyamum,  
stramonium, aconitum, flammulam Iouis,  
dictamnium, pulsatillam, colchicum, gra-  
tiolam, vuam vrsi, phellandrium, cynapi-  
um, et cetera? Quid *querneas* dicamus  
*glandes*, quarum paene mirifica in reseran-  
dis glandularum obstructionibus efficacitas  
nuperrime admodum magno laudum appa-  
ratu est celebrata? Adeo, vt huius reme-  
dii

✱✱✱✱✱

---

dii vindex statorque, ob seruatos ciues,  
merito ciuica, hoc est, querneia corona dig-  
nus existimari posset. Verum enim vero,  
vtcumque haec sint, tamen amplissimae istae  
laudes suspicione non carent: quandoqui-  
dem pluribus medicis clinicis non licuit esse  
adeo felicibus, vt attente circumspēcteque  
adhibitarum glandium quernarum effectus  
expectationi responderet. Proinde, speci-  
men quoddam sollemne medicum in prae-  
sentia apparaturus, dignam hanc existimaui  
materiem, quae singulari tractaretur ope-  
ra: non, vt carpendi pruritui satisfiat, sed  
vt pures medicorum ad explorandas obser-  
uandasque veras, genuinas, constantesque  
glandium virtutes medicas inde excitentur.  
Eo consilio passim glandibus tributas ma-





---

nae efficacitatis medicamentosae laudes *primo* complectar *capite*: quae medentis spem fefellerunt, aliquot exempla *altero* additurus, simulque rationes dubiae inconstantisque huius virtutis, quoad eius fieri poterit, breuissime inuestigaturus.

*Votum secundet, qui potest, nostrum Deus.*

SENECA.

---

SEC-





## SECTIO PRIOR,

DE GLANDIVM QVAERNARVM VIRI-  
BVS MEDICIS HACTENVVS CE-  
LEBRATIS.

## §. I.

*Praemonenda quaedam de glandibus.*

De quibus nunc breuiter differere instituimus, *glandes* sunt fructus arboris cuiusdam peruulgatissimae, quae est *quercus cum longo pediculo* CASPARI BAVHINI, et *quercus robur*, foliis deciduis oblongis, superne latioribus; sinubus acutioribus; angulis obtusis, CAROLI LINNAEI: a quo summo nuper botanico classi inseritur, quam ipse *monoe- ciam polyandriam* dixit. Magnam huius arboris partiumque inde decerptarum iam pridem apud antiquos medicos fuisse existimationem, haud difficulter ex veterum monumentis demonstratum essemus ituri, si vacaret. Inprimis adstringens vrinamque ciens facultas, quae in quercu eiusque partibus maxime est conspicua, effecit, vt iam ab antiquis temporibus *cortex, folia, glandes, cupulae* atque *gallae* quer-



quercuum in tabernis medicamentariis conseruarentur. Atque hoc etiam nomine externus aequae, ac internus querneorum medicamentorum vsus iam apud HIPPOCRATEM, THEOPHRASTVM, ERESI-  
VM, DIOSCORIDEM ANAZARBAEVM, C. PLINI-  
VM SECVNDVM, CL. GALENVN, aliosque passim  
deprehenditur laudatus commendatusque. Quo-  
rum omnium sententias cum concinne strictimque  
exposuerit IACOBVS DALECHAMPIVS, aut quis-  
quis est *historiae vniuersalis plantarum Lugdunensis*  
auctor a), lectorum venia haec ipsa verba hic sub-  
iungemus. *Quercus omnis, inquit ille, adstrictoriam*  
*vim habet, praesertim liber, qui cortici et ligno in-*  
*tercedit: quin etiam tunica, putamini glandis sub-*  
*iecta. Decoctum ex iis datur dysentericis, coeliacis,*  
*sanguinem exscreantibus. Trita in pessa feminis,*  
*fluxione vulvae laborantibus, subiicitur. Glandes*  
*eosdem effectus exhibent, vrinam ciunt, capitis dolo-*  
*rem et flatus in cibum sumtae pariunt, resistunt esi-*  
*tatae venenatorum ictibus. Decoctum earum et cor-*  
*ticis cum lacte vaccino potum, prodest contra toxica.*  
*Intritae crudae inflammationes illitu leniunt: ad du-*  
*ritias, quas cacoethes vocant, et malefica vlcera cum*  
*falsu axungia conueniunt. Haec DIOSCORIDES.*  
*GALENVS vero, quercus partes omnes, inquit, ad-*  
*strin-*

a) In libr. supra allegat. pag. 12.




*stringentis facultatis participes sunt: sed plus tamen, quae in trunci cortice membrana subest; tum, quae sub glandis ipsius, non calyculo, ut Gerardus interpretatur habet, sed putamine est, ea videlicet, quae fructus carnem conuestit. Quam ob rem ad profluuium muliebre, sanguinis exspuitiones, ventrisque diuturnos fluxus commodam esse credunt. Maxime vero ea utuntur decocta. Ego quandoque glutinasse me vulnus memini, securi inflictum, cum nullum adesset ad manum medicamentum, praeter ipsius quercus folia. Terebam ea in laeui saxo, et vulnus omnemque vicinum locum illinebam. Eandem cum foliis vim habet et fructus quercus, eoque medici nonnulli ad incipientes et crescentes utuntur phlegmonas. HIPPOCRATES praefocationi vteri folia quercus adhibet in suffitu. Glandium esum urinam ciere, etiam vulgo notum est: quod adsiccatas istas in usum adseruat, si quis urinae difficultate tentetur, vsurpandas. Haec ille.*

## §. II.

### *Nuperae quaedam glandium laudes.*

Verum enim vero licet tot tantaeque medicamentorum querneorum laudes diu adhuc posteris temporibus inter Arabes et vulgo sic dictos la-



*tino-barbaros medicos b)* constarent; sensim tamen, nostra patrumque memoria, euilesce coeperunt, postquam, inter noui orbis spolia, variorum quoque remediorum genera, quernearum partium virtutes non aequantia solum, sed etiam superantia, in pharmacopoeorum tabernas, sunt illata. Quo nomine in exemplum excitamus corticem Peruvianum siue *Chinchonam* LINNAEI, corticem cascarillae, siue *Croton* LINN. et corticem Simarouba siue *Burseram* LINN. Sed, vt fit, nostra quoque aetate verissimum deprehensum est illud HORATII: *Multa, dicentis, renascentur, quae nunc cecidere, cadentque, quae nunc sunt in honore.* Admodum nuper enim celeberrimus in Marburgensi vniuersitate litteraria Professor medicus, FRID. IOS. GVIL. SCROEDER, pristinum quercui inter medicos honorem restituere, eiusque glandes optimi resoluentis obstructasque glandulas aperientis remedii loco habere

b) His quoque adnumerandus est ARNOLDVS ille *Villanouanus*: cuius *Traëtatüm de virtutibus benedictae quercus* nuper in bibliotheca augusta Guelpherbytana deprehendit, breuiterque recensuit vir celeberrimus G. E. LESSING. Conf. viri clar. MARCVS HERZ *Briefe an Aerzte*; I. Saml. pag. 211. seq. qui profecto per iocum tantummodo insinulare videtur SCHROEDERVM plagii in ARNOLDVM hunc commissi: cum ipse ARNOLDVS exscripserit ea, quae iam a THEOPHRASTO, DIOSCORIDE, atque PLINIO relata leguntur.



habere conatus est c). Cuius virtutis notitiā vtrum ipse suo eruerit ingenio, an aliunde repetierit? neque interest lectorum, neque disceptare nostrum existimamus. Proxime ab hoc, nisi fallimur, clarissimus apud Hanoueranos medicus, D. MARX, singulari commentatione d) efficacitatem glandium medicam in infantum atrophiiis mirifice laudauit, propositisque exemplis dedit confirmatam. Post ea porro itidem praestantissimus vir, qui Dethmoldae medicinam facit, SIMON HENRICVS ADOLPHVS KEISER, de eodem glandium vsu antatrophico singulariter disseruit, nouoque optabilis euentus exemplo firmauit e). Quo ex tempore dein in pluribus commentariis litterariis medicis celebratae sunt glandes, simulque in multorum medicorum clinicorum vsum frequentationemque venerunt.

### §. III.

#### *Actuosae glandium partes.*

Ante omnia autem quaeri oportet, quatenam  
actuosae insint glandibus particulae, quibus tantae,

B 2

tamque

c) In epistola, ad illustrem BALDINGERVM transmissa: *Von den Wirkungen der Eicheln, Verstopfungen der Drüsen im menschlichen Körper aufzulösen*; Goettingae, CLJLCCCLXXIV.

d) In dem Hannoerischen Magazin, d. XXVI. Decembr. CLJLCCCLXXIV.

e) In dem Vnterricht von dem Nutzen und besonderer Heilungskraft der Eicheln; Lemgouiae, CLJLCCCLXXV.



tamque efficaces in humano corpore virtutes debentur acceptae. Qua super re primo audiamus ipsum celeberrimum SCHROEDERVM, glandium restitutorem, ea quippe, quae sagaci velut naso in iisdem indagauerit, ingenue exponentem *f*). Postquam igitur ille ipse praemonuit lectores, non fortuiti experimenti, sed sollertis meditationis accurataeque ratiocinationis opus hoc suum esse inuentum *g*), porro refert: ad tollendam glandularum obstructarum, vel ipsarum scirrhosarum, obturationem duplici opus esse remedio, altero, quod glandulosis vasculis impactam materiem viscidam tenacemque dissoluat, solubilemque et fluidam reddat; altero vero, quod relaxatis atque debilitatis minorum istorum vasculorum tunicis robur irritabilemque vim reparet restituatque. Neque sufficere horum remediorum alterutrum, licet interdum medicatrix natura humani corporis, quod defuit, addidisse sit visa. In omni porro medicamentorum, vtraque dicta virtute medica haecenus conspicuorum, apparatu, quem ipse breuissime recenset, nihil, addit, deprehensum fuisse aptius et ob faciliorem ad  
ipfas

*f*) In libelli citati Sect. I. pag. 8. seq.

*g*) Qua de re non litem mouebimus cum aliis optimo SCHROEDERO, si referandarum glandularum obstructarum virtus spectetur.



ipfas obstructas glandulas transgressum commenda-  
 bilius, quam ipsam istam *portionem gummosam*,  
 quae a natura glandibus est indita. Hanc autem  
 aquosae decoctionis ope ex glandibus extractam se-  
 paratamque portionem adfirmat esse materiem vi-  
 scidam gummeo resinofam et semifulphuream, omni  
 acore carentem. Ad quae porro addit *h)*, tantam  
 viscidam cuiusdam humoris copiam huic inhaerere ex-  
 tracto, vt, nisi ille superfluous maximaque ex parte  
 noxius humor, dum vsui apparantur glandes, sepa-  
 retur, certissime fore, vt ab eius vsu aut dissoluan-  
 tur nimis humores animales, aut iusto magis spif-  
 sentur. Quam viscidam materiem forte conuenire  
 existimat cum natura atque indole eius, quae cro-  
 co, opio, cicutaecque inest, quamque medici vete-  
 res humidum sulphur appellarunt. Ergo corrigendi  
 atque ab hac noxia parte liberandi glandium de-  
 cocti methodum sequentem praescripsit celeberrimus  
 SCHROEDERVS *i)*: Seliguntur glandes optime ma-  
 turae, nec dum carie infestatae, decorticataeque,  
 vnde in duas portiones dehiscunt, leniter ficcantur.  
 Tum porro moderate torrentur sub perpetua agi-  
 tatione: ita tamen, vt sollicitè caueas, ne aut exu-  
 rantur, aut in summam redigantur siccitatem. Cui

B 3

vsui

*h)* In *libr. citat.* pag. 19.

*i)* *Ibidem.* pag. 23. seq.



vsui optime inferuit machina ista ferrea peruulgatissima, Coffeae tostioni apta, (*Coffeetrommel.*) Teruntur denique haud aliter, ac Coffea, consueto more. Harum igitur tostarum tritarumque glandium semunciae, singulas in doses, infunditur aqua feruida, protinus denuo per linteum bibulamue chartam colanda; ficuti nunc in comparando Coffeae potu moris esse solet. Quod infusum, quo minus partim nauseam bibentibus excitet, partim incommodet ventriculo, parte quadam nervis amica haud inopportune augeri potest, ipsis nempe Coffeae vulgo sic appellatis fabis, ex more tostis commolitisque. Semunciae glandium conueniunt duae Coffeae drachmae. Atque hanc adhibendarum glandium methodum dein sequuti sunt supra iam cum honoris praefatione nominati viri, MARX, KEISER, MARCVS HERZ, alique medici clinici. Ego vero antea, quam ipse, quantum viribus in aegrotantium corporibus valerent glandes querneae, experirer, non superuacaneum existimaui, meis conspiciere oculis, quasnam potissimum particulas glandium mixtioni naturae dispensatio indidisset. Probe autem conscius, vegetantium naturalem misturam saepenumero a natalis foli diuersa indole mirifice mutari, id egi, vt ex quercubus, hic arenosa, illic lutosa argillosoae, istic vero pingui in terra nascentibus, seligerem glandes,



des, simulque omnes, tam simpliciter ficcatas, quam moderate tostas, examini subiicerem. Menstruis, quae chemici vocant, usus sum, cum aqua feruida, tum vini alcohole. Singulae glandium doses examinandae fuerunt quatuor vnciarum: singulisque infusa portio feruentis aquae duodecim vnciarum, totidemque alcoholis. Vtrumque postea menstruum, leni digestionem in extrahendis particulis adiutum, denuo moderatissimo igne in auras est abactum; quo relictis extractis, in magma fere solidum spissati, copia definiri posset. Hac igitur ratione obtinui ex glandibus arenosi soli vncias duas et drachmas tres scrupulumque dimidium extracti gummosi, amaro et subadstringente sapore praediti, neutiquam tamen nauseosi; vnciam vero vnam et sesquidrachmam cum sex granis extracti cuiusdam resinosi, itidem amaricantis, sed minus adstringentis, ceteroquin autem nauseam facile excitantis. Glandium in argilloso terra natarum extractum gummosum erat duarum vnciarum totidemque drachmarum vna cum quinquaginta granis; resinofum vero aequabat pondus fere fescunciae: ceterum sapor cum priori conueniebat. Quas denique pinguis aluerat humus, glandes gummosum dabant extractum duarum cum semisse vnciarum; resinofum vero vnius tantum vnciae supra quatuor scrupulos. Resinofi inprimis hu-

ius




ius extracti sapor prae reliquis plurimum erat amarus atque nauseosus. Quae ab omnibus his extractionibus supererat, terra deprehendebatur iners, fatua, et omni sapore odoreque carens. Ad easdem rationes examinatae diuersae istae glandes, tostione apparatus, haud quidem adeo minus vtriusque suppeditarunt extracti, perditis quippe vix sex septemue granis: sed colato inprimis infuso, postquam absolute refrixerat, innatarunt aliquot guttulae olei cuiusdam empyreumatici, valde acris et amaricantis. Semisulphureum vero istud, quod celeberrimus SCHROEDERVS hic obseruauerat, quodque cum vaporoso principio aliorum medicorum conuenire videtur, hic nusquam deprehendi.

#### §. IV.

##### *Virtutes medicae, exemplis confirmatae.*

Verum enim vero, quae haecenus de primariis glandium partibus exposuimus, (§. III.), ita sunt comparata, vt profecto Oedipum te esse oporteat, non Dauum, si, praeter virtutem aliquam tonicam et subadstringentem, aliarum virium quidquam subolfacere possis. Ciendae enim vrinae efficacitatem, veteribus iam cognitam, facillime ex adstrictione deriues. Sed subolfacere, immo per  
ratio-





cinationes eruere longe aliam nobiliorem virtutem sibi visus est optimus SCHROEDERVS; virtutem nimirum, singulari quodam irritamento plenam; non eo, quod iusto celerius alium trahat, sed quod longiori mora pedetentim in subtilissimos humani corporis canales irrepat, ibidemque constanti nisu quemcunque humorum lentorem dissoluat moderatissimamque vim tonicam solidis sensim inferat. Cuius actionis testem, monente SCHROEDERO, habemus singularem illum viscidulum foetentemque sudorem, ab usu huius remedii plerumque accedentem k). Hanc ergo efficacem glandium vim resolventem intuentes SCHROEDERVS aliique clarissimi medici earundem usum in diuturnis longeque gravissimis morbis experiri coeperunt. Quorum experimentorum breuissimam syllogen, lectorum venia, hic sumus daturi. In suo ipsiusmet corpore prima huius rei tentamina instituit SCHROEDERVS. Corpus ipsius summe imbecille, a sedentario vitae genere profundisque meditationibus debilitatum, venisque turgidis et plerisque externis glandulis tumens atque induratis plenum, vnde haud dissimilis internarum adfectio coniici poterat, vix octo dierum intervallo, postquam huius remedii fuerat usus,

C

denuo

k) In libr. citat. pag. 17 et 20.

l) Ibidem, pag. 28.



denuo mirifice est refocillatum confirmatumque, discussa simul atque dissoluta glandularum obstructione *l*). Quinquennis puellae corpusculum, quod extrema consumserat atrophia, quodque umbram paene dixeris, nisi turgidum durumque abdomen ficcatumque a tabe dorsum contraria declarasset, hausta quotidie haec ex tostis glandibus potio, vix elapsis aliquot hebdomadibus, in integram restituit sanitatem *m*). Eadem glandium saluberrima efficacia constitit quoque in alio quodam homine, cui erat *dura cutis, per quam spectari viscera possent, ossa sub incurvis exstabant arida lumbis*. Mox enim atque manifesto ab usu nostri remedii tetrum hunc deposuit morbum *n*). Eodem medicamento alium quendam aegrotum a turpissima scabie, leprae haud adeo dissimili, breue intra tempus efficacissime liberavit SCHROEDERVS *o*). Neque in aliis exanthematibus, speciatim in variolis difficulter suppurantibus, et furunculis copiosis vehementerque dolentibus, inefficax glandium deprehensa est virtus *p*). Quid? quod eadem arthriticum potenter alleuasse existimari possent, nisi simul datum quoddam remedium mercuriale martiatum nostris glandibus dubiam redderet palmam *q*). Quid dicam de atrocissima

*m*) Ibidem, pag. 30.

*p*) Ibidem, pag. 32.

*n*) Ibidem, pag. 31.

*q*) Ibidem, et pag. seq.

*o*) Ibidem.



cissima illa lue venerea, et summo adfectus hypochondriaci gradu, iam in cachexiam grauissimam conuerso? Quod vtrumque malum a paullo protractiori huius medicamenti vsu penitus sublatum refertur *r*). Qua super re fides sit penes SCHROEDERVM: qui ex vniuerso hoc experimentorum apparatu statuit, in omnibus glandularum, immo ipsorum quoque viscerum, obstructionibus infarctibusque nec potentius efficaciusque, nec praesentius esse remedium, quam ipsas glandes.

## §. V.

### *Idem argumentum.*

Cum, quae omnia de glandium eximio vsu passim commentatus est clarissimus apud Hanoueranos medicus, *D. Marx*, nobis ad manus nunc non sint, duo tantummodo illa memorabilia tabidorum aegrotantium exempla in *promptuario*, quod dicitur, *Hanouerano* *s*) descripta, breuissime hic subiungemus. Infanti bimulo, in summum atrophiae gradum deducto, adeo, vt nec vllum omnium istorum pessimorum symptomatum, infantilem hanc pestem designantium, deesset, et in quo vel optimorum se-

C 2

lectissi-

*r*) *Ibidem*, pag. 33.

*s*) Ann. clbcccclxxiv. ad de xxvi. Decembr.



lectissimorumque medicamentorum iners fuerat efficacitas, solum tostarum glandium, Coffea remixtarum, infusum, et lacte saccharoque gratius redditum, vix praeterlapsis tribus hebdomadibus symptomatum alleuamentum, trium vero mensium intervallo integerrimam attulit sanitatem. Longe autem memorabilius exemplum proposuit femina fere quinquagenaria, in qua mirificam omnino, nedicam portentosam vim ostenderunt glandes. Quippe post biliosam febrem ex lenta tabe marcescentem consumeabant internus cum sicca cute ardor, vna alteraque post pastum hora ingrauescens, effusissimusque a primo statim somno sudor. Extremi periculi testes erant arteriarum pulsus parvus, mollis, et celer; oris siccitas cum siti perpetua; nigricans linguae crusta; abdomen inflatum, durum, et a tactu dolens; vrina turbida, oleosa, mutabilisque coloris; aluus adstricta, solisque clysmatibus excitanda; oedemata; dyspnoea cum sicca tussi; menstrua deficientia, aut dolorifica; feces aluinae saepe numero purulentae: vnde fieri non poterat, quin facies aegrotae euaderet Hippocratica. Ergo huic datum est glandium, cum octava fabarum Cacao parte remixtarum, decoctum, lacte temperatum, quotidie hauriendum. Glandium dosis in singulos dies erat vncia. Quis crederet, tantam tot dirissimorum



rum malorum complicationem quinque hebdomadam spatio prorsus euanuisse, nisi ipsa res, exemplo firmata, fidem fecisset? Sed *Keiseriano* quoque experimento probata est glandium efficacia *t*). In bienni enim infantulo, cui aequae, ac bimulo isti priori, tota symptomatum atrocissimorum atrophiecorum incubuerat cohors, corpusculumque enerue effecerat atque summe exhaustum; quotidiani potus loco datum hoc et cum lacte saccharoque mixtum glandium infusum non solum, interiecto sex hebdomadam interuallo, quae maxime infestabant, sustulit symptomata, sed etiam insignem intestinalium vermium expulit copiam: adeo, ut dehinc prorsus recuperandae sanitatis spes amplissima sit facta. Agmen harum observationum clinicarum claudant aliquot exempla aegrotantium, ex adfectibus leucophlegmaticis laborantium, in quibus glandes, praedicta methodo applicatae, insuperque cortice Peruviano interpolatae, observante clarissimo medico Berolinensi, MARCO HERZ *u*), eximie profuisse sunt visae. Ex his aegrotis duae in adfectiones leucophlegmaticas, intermittentes post febres, inciderant; tertia vero a diu protracta linteorum lotione et admissa simul graui iracundia. In omni-

C 3

bus

*t*) In libell. iam citat. pag. 15. seq.

*u*) In epistol. allegat. pag. 180. seq.



bus singulisque his a nostri medicamenti usu mox cesserunt leucophlegmatica symptomata: quae nunc figillatim exponere, superuacaneum existimamus, quoniam *Herzianis epistolis*, quippe facile parabilibus, haud quenquam medicorum cariturum esse arbitramur.



## SECTIO POSTERIOR, EXEMPLA PRIORIBVS CONTRARIA RECENSENS.

### §. VI.

#### *Praemonenda quaedam.*

**V**erum enim vero iam antiquissimae et inter omnes medicos clinicos spectatae est observationis, nullius medicamenti, si vel optimum praestantissimumque seligas, absolutam constantemque esse efficacitatem, sed cuiuslibet actionem a variis multiplicibusque causis concurrentibus; et ipso inprimis corporis aegroti habitu naturaue, speciatim disponi definiriue. Caue igitur, ne et glandibus nimium



mium tribuas, nimiumque credas colori. Nae! enim ex mixtionis, glandibus a natura praestitutae, conditione vix eminentissimam illam vim resoluentem euoluturus esses, nisi experimenta rei fidem fecissent. Proinde et iisdem fides deneganda non est, si, ut fit, interdum prioribus experimentis contrarios effectus demonstrant. Nam perinde profunt notitiae eorum, quae nocuerunt, ac eorum, quae profuerunt. Atque hac etiam ratione efficitur, ut, collatis comparatisque inter se salutaribus noxiisque eiusdem remedii effectibus, iustum denique verumque eidem statui possit pretium. Nimias istas glandium, ob resoluendarum obstructionum glandularum virtutem, celebrationes certe suspiciosas reddiderunt varia exempla, in quibus eadem ipsae medicorum spem expectationemque fefellerunt. Ingenue, ut est veri amans, fatetur clarissimus MARCVS HERZ x), amico suo, D. MARXIO, vni ex praecipuis glandium praeconibus, semet ipsum nec in hydropibus, nec in catochis, nec in rhachitidibus, nec in chronicis tussibus aliquid vidisse unquam adiumenti, quod glandium tostarum infuso in acceptis fuisset referendum: immo, nec illas ipsas, quas recensuit, adfectuum leucophlegmaticorum curationes solis deberi glandibus, sed coniuncto simul cortici

x) *Ibidem*, pag. 179.



cortici Peruuiano. Sed in glandularum quoque obstructionibus efficacitatem glandium, hoc alioquin nomine inprimis celebratam, haud raro defecisse, sequentia docebunt exempla.

## §. VII.

### *Aliquot exemplorum recensio.*

Quatuor annorum puella iam ex sesquianno sensim tabescere coeperat, captis ex nocturna, sub aestuosa aestatis tempestate, refrigeratione atrophiae initiis. Eo ex tempore enim frequentes primo interuenerant serosae alui fluxiones, deprauataeque alimentorum assumendorum rationes: tum accesserat lento progressu febricula nocturna, adeo denique ingrauescens, ut nunc iam integrorum quatuor mensium spatio nulla remissione alleuaretur. Femorum brachiorumque summa erat macies, abdomen contra turgidum, inflatum, impressioni renitens, nodisque distinctum. Facies conspiciebatur Hippocratica. Linguam albicans tegebat crusta. Paruo, debili, mollique ictu micabant arteriae; lotium emittebatur crudum, mox tenue, mox sublaeteum. Sudores frequentes et effusi. Aluinae excretionis inconstans ordo ratioque: ipsae feces mox ficcae et induratae, mox fluidae mixtiquae coloris. Ad haec aegrotam



aegrotam vexabant frequentes intestinorum cruciat-  
tus et perpetua fere atque sicca tussis. Quibus ma-  
lis omnibus tandem corporis animique vires abso-  
lute sunt exhaustae. Ergo, tot glandium in huius  
generis morbis proficuarum laudes intuitus medi-  
cus, cuius opem nunc implorabat aegrotae mater,  
in singulos dies semunciam tostatarum glandium, mo-  
dica Coffeae portione mixtarum, praescripsit, eius-  
que misti pulveris infusum, lacte temperatum, con-  
sueti potus loco haberi iussit. Sed defuit spei hic  
usus. Prima enim iam hebdomade aluus, alioquin  
inconstantis obsequii, penitus ficcari coepit, solis  
enematibus denuo emollienda: nec urinae satis expe-  
ditum erat profluuium, et, quae exibat, aqueae  
erat limpiditatis. Praeter abdomen, etiam superi-  
ores inferioresque artus oedemata contrahebant.  
Continuato nihilo minus dicti remedii usu per tres  
adhuc hebdomades omnia in peius ruere sunt visa,  
nec interposita Chinchonae admixtio coërcuit, aut  
saltem mitigavit malum. Tussis enim pristina in  
spasticum asthma, suffocantisque catarrhi initia tran-  
sit, intensa est febris, aluus nunquam non clausa,  
et extremum successit virium decrementum. Quin-  
ta igitur hebdomade abstinuit medicus inutili me-  
dicamento, et sero lactis dulci, leniter chinato y),

D

primo,

y) Corticis Peruviani drachmae tres in singulos dies sunt datae.



primo, quoad eius fieri potuit, refocillauit aegram. A quo cum iterum alius leuiter laxaretur, febrisque post duodecim circiter dies denuo remitteret, decresceretque asthma, dicto lactis sero iunctae sunt pilulae, ex cicutae extracti quinque granis vnicoque mercurii dulcis martialis grano  $\gamma$ ) compositae, quotidieque vesperi aqua solutae infanti datae. Abdomini vero ea parte, qua potiores tactu deprehendebantur nodi, superimpositum est de cicuta emplastrum, oleo feminis hyoscyami expresso subactum. Atque haec medendi ratio tandem vndecim hebdomadibus elapsis, vt conualesceret aegra, effecit. Noli autem existimare, nos in vnico tantum exemplo expectata glandium efficacitate esse destitutos: idem enim in quinque aliis infantibus atrophicis nobis accidit, neque ea contigit nobis felicitas, vt vel vni aegrotantium, atrophia vexatorum, glandium vsu aliquid adferremus adiumenti.

## §. VIII.

### *Idem argumentum absoluitur.*

Supererat, vt, meliusne forte efficaciusque in adultis hominibus glandes expectationi satisfacturae  
fint,

2) Confer optimi PRAESIDIS *dissert. de mercurio dulci martiali*, hic ann. CLCLCCCLXXIV. emissam.



fint, nec ne? experimentis declararetur. Oppor-  
tune sese obtulit virgo, viginti duo annos nata, ro-  
busti corporis, viuidique in vultu coloris, legitime-  
que ex catameniis purgata, neque quidquam, quod  
ceteroqui valetudini esset aduersum, experta. Huic  
autem, postquam a nimio motu incaluerat corpus,  
admissum in graui frigidi aëris tractu refrigerium  
tumores parotidum et nonnullarum glandularum cer-  
uicalium subaxillariumque satis insignes attulerat, ab  
intempestiuo *aquae Goulardianae saturninae* vsu in  
perfectos scirrhos mutatos. His ergo scirrhis sol-  
uendis, quoniam nondum effoeta naturae medica-  
tricis videbatur virtus, opportunissimum aestima-  
tum est, de quo nunc disputauimus, tostarum glan-  
dium infusum. Proinde huic vsui quotidie desti-  
nata est glandium vncia, adiuncta dimidia Coffeae  
parte. Postquam in alteram hebdomadem potaue-  
rat aegrotata hunc potum, instantium catameniorum  
non successit profluuium, frequensque superuenit  
cardialgia. Tantam autem hoc in remedio pone-  
bat fiduciam, vt vsus eiusdem neūtiquam per ali-  
quot hebdomades intermitteretur. Inter haec au-  
tem et alius, alioquin obsequiosa, saepe numero per  
aliquot dies officio suo non est functa. Acces-  
serunt quoque spirandi difficūltates cum ventriculi ex-  
pansione. In ipsis scirrhis nulla conspicua animad-



uersa est mutatio: nisi quod in iisdem quasi pun-  
gentem aegra sentiret dolorem. Denuo ingruens  
mensium periodus sine successu est elapsa. Sed sub-  
secuta septima ab instituto glandium usu hebdoma-  
de pedes oedemata occupauerunt, faciem vero co-  
lor tumorque cachecticus. Vrina tunc erat cruda  
et aquosa, aluus frequenter infrequens. Turgebat  
simul abdomen, appetitus ciborum vix ullus, ven-  
triculi dolor, cum ructuum copiosa explosione, gra-  
uis, et a parco pastu ingrauescens. Scirrhi tunc  
temporis incrementos, neque minus, ac antea, du-  
ri. Sed glandes consumere natam se putauit aegra.  
Cum autem tertium quoque vterina deficeret pur-  
gatio, et ante dicta symptomata in dies magis ma-  
gisque augerentur, tandem, pertaesa futilis reme-  
dii aegrotata, sua sponte ab eius usu sibi temperauit.  
Quibus deinde remediis sanitas miserae huius puel-  
lae fit redintegrata, solutique scirrhi, nunc non at-  
tinet dicere, neque instituti interest nostri. Haud  
felicior euentu fuit illa expectatio comparandi ex  
glandibus auxilii, quam conceperat amicus quidam  
noster, in proxima Lusatia rure degens: cuius fili-  
us, duodeviginti annos iam supergressus, nescimus,  
qua de causa, iam ex sesquianno strumosos in collo  
acceperat tumores; ceteroqui sanus, nisi quod per-  
petuo, quae huiusmodi morbi esse solet indoles, a  
leuissimo



leuissimo corporis motu nonnihil anhelaret. Lecta igitur illa celeberrimi SCHROEDERI ad illustrem BALDINGERVM epistola mirifice sibi gratulatus est sollicitus pater de efficaci quodam remedio, quo enatas filio suo strumas certissime depellere posset. Iniit ergo cum medico suo familiari hac super re consilium: qui et lubenter annuit, et quotidiano vsui glandium tostarum sex drachmas, tribus Coffeae drachmis mixtas, consuetoque more infundendas praescripsit. Mox autem tepidi, mox frigidi huius potus fuit vsus. Magna cum salutis expectatione haec ipse bibit aeger. Prioribus binis hebdomadibus nulla strumarum obseruata est mutatio: sed media circiter tertia hebdomade plures in collo glandulae intumescere, antiquiores vero isti tumores magis indurari coeperunt. Ad haec etiam, quae alias erat naturae obsequiosa, alius tardior et in dies magis magisque infrequentior est facta, nec pristina illa constans ciborum appetentia perstitit. Viuidum quoque et roseum faciei colorem manifesto leucophlegmaticus dispulit pallor. Hac ergo re perterriti, pater et filius, et adhuc peiora timentes, suibus permiserunt glandes, et ancipiti abstinuerunt medicamento. Istis deinde strumis, altero anno post, liberatus est aeger, doctissimi cuiusdam medici Dresdensis consilio remediisque transmissis vsus:



quorum vero notitia ad nos non peruenit. Adde-  
re liceat huic exemplo aliud, itidem memorabile;  
ex quo intelligant clinici, in haemorrhoidum cum  
aliis morbis abdominalibus complicatione haud op-  
portune glandium commendari vsum. Vir quidam  
litteratus, et in vicino quodam oppido dicendi iu-  
ris regendaeque ciuitatis munere fungens, eaque  
de causa saepe numero ad curas, sollicitudines, ira-  
cundiasque adductus, iam aliquot abhinc annis ex  
hypochoondriorum laborauerat cruciatibus frequen-  
tibusque haemorrhoidibus, cum fluentibus, tum  
caecis. Nunc autem, vix quinquagenos supergres-  
sus annos, per octo menses integros nullum exper-  
tus erat haemorrhoidum profluuium, solis supersti-  
tibus ad anum tuberculis varicosis. Quae dum fie-  
rent, sensim abdomen turgere et a flatibus vehe-  
menter distendi coepit. Ergo continui fere aderant  
ructus atque borborygmi, aluique constipationes.  
Arteriarum pulsus magni erant, pleni durique; lo-  
tium crudum; inaequales per somnum sudores. Ve-  
na inter haec in pede bis sine salubri effectu est  
secta. Pedetentim ingruebant frequentes dolores  
colici cardialgicique, dyspnoeae, et asthmata. Tunc  
ipsi a medico, quo familiariter utebatur, imperatus  
est glandium, quem diximus, vsum. Sed vix men-  
sis praeterierat, ex quo huic remedio locus fuit,  
cum



cum vniuersum aegroti corpus hydrops intercus occuparet, et cetera ista omnia symptomata summum caperent incrementum. Quae postea acciderunt, nondum rescuiimus: Berolinum enim profectus est aeger, experturus, vitamne, an mortem, Berolineses medici in sinu gerant? Vtram reportaturus sit, nunc nostra non refert: hoc autem nostri interest voti, vt, cui nunc finem imponimus, commentationem nostram aequi bonique consulant beneuoli lectores.

---

EMENDANDVM.

Pag. 5. l. 14. pures lege plures.



TERENTIVS.

*Obsequium amicos, veritas odium parit.*





